

**Šefik Džaferović:**

*Inicijativa upućena Vijeću ministara BiH* – „Ja sam 3.11.2011. primio pismo od Udruženja otpuštenih radnika iz Republike Hrvatske, "Ugor" Jelah-Tešanj, u kojem se podsjeća na aktivnosti koje je ovaj parlament imao kada je problematika otpuštenih radnika iz Republike Hrvatske u pitanju. Predstavnički dom Parlamentarne skupštine BiH je na 53. sjednici, od 13. maja 2009., podržao plan mjera koje je potrebno preduzeti za rješavanje problema građana BiH koji su u Republici Hrvatskoj ostali bez posla u periodu '91.-'95. godina, a koji je usvojilo i Vijeće ministara BiH na 78. sjednici, od 26.2.2009.

Vijeće ministara BiH obavezno je da izvještava Predstavnički dom o realizaciji predviđenih mjera. Plan se prema ovom pismu uglavnom ne provodi, a prema vjerodostojnim saznanjima Udruženja, Uprava za konzularne poslove Ministarstva vanjskih poslova i Evropskih integracija Republike Hrvatske, aktom od 27.5.2010., obavijestila je Ambasadu BiH u Zagrebu da institucije Republike Hrvatske ne osjećaju potrebu ni da razgovaraju o problemu radnika koji su ostali bez posla u periodu '91.-'95. godina.

Na ovakav stav Republike Hrvatske reakcije institucija BiH nije bilo. Zaključak Predstavničkog doma, od 30. 12. 2010., i Odluka Vijeća ministara BiH, od 26.9.2010., ispoštovana je u dijelu koji se odnosi na odobravanje sredstava u iznosu od 100 hiljada maraka koja su prebačena na račun Udruženja. Odluka Vijeća ministara BiH je sasvim jasna vezano za namjenu odobrenih sredstava za pomoć u sudskim sporovima, ali u dobroj namjeri da se razjasni ono što Udruženju nije bilo dovoljno jasno, način utroška i pravdanja odobrenih sredstava od Ministarstva civilnih poslova BiH i Ministarstva vanjskih poslova BiH, Udruženje je tražilo određena dodatna uputstva. Prema ovom pismu, nažalost, Ministarstvo civilnih poslova BiH i Ministarstvo vanjskih poslova BiH se jednostavno spore ko treba da postupi po njihovom traženju, tako da Udruženje ima svojevrsnu blokadu novca koji je dodijeljen kao za rad na ovom problemu. Zbog toga moli da se ovdje u Parlamentarnoj skupštini BiH, i ja to činim ovom prilikom, zatraži izvještaj Vijeća ministara BiH o provođenju mjera i aktivnosti za rješavanje problema građana BiH koji su u Republici Hrvatskoj ostali bez posla u periodu od 1991. do 1995. godine. I ja molim da Vijeće ministara BiH dostavi ovaj izvještaj da ovdje u Parlamentu o njemu raspravljamo još jednom”.